

*Çu qui dj' vos va raconter s'a passé insi, à on fistu près.  
Dj'a seûlemint candjî saquants noms.*

### *À L'ETEREMINT DA ZIRÉ*

Dins on p'tit viladje di Famène, d'habitude tot paujêre, gn-a là on raploû d' tos lès diâles. « C'est qu'i-gn-a on gros ètèremint ! » m'aveûve-t-i anonci l' Zande qui v'neûve po s' vî camaråde Ziré. I travayin.n' èchone aus contributions, à Mautche.

Sovint lès djins pudenut lès controleûs po dès-omes fwârt sérieûs. Èt c'est co bin l' vraî quand nos tchèyans su on laîd mama. Mins avou zèls deûs èt leûs soçons Twin.ne, Li Gusse èt l' Zidôre, on n'esteûve nin à l'après d'one craque. One bèle binde di lascârs qui si r'trovin.n' voltî po djouwer aus cautes, ènn'aler èchone veûy on match di fotbal, oudobin fièster lès-ans d' n-on-l'ôte. Èt jamais prèssés d' rentrer, savoz : « On n'a qui l' bin qu'on s' fait, don ! »

Su lès cinq, c'esteûve todi au Ziré qu'il ariveûve one aroke. Ostant dire qu'i n'aveûve wêre di chance cit-ome la. Èt l' Zande si d'mandeûve çu qu' 'l aleûve co lî ariver li djoû di s' dêrin voyadje.

Tot s'a bin passé do timps d' l'ofice. Li curé s'a bin brouyî di p'tit nom on côp ou deûs. « Nin sbarant avou on-èwâré parèy ! », aveûve-t-i dit l' Gusse, qui l' conècheûve po-z-aler véla tos lès dîmègnes à mèsse. « Mins à paurt ça, tot l' monde a trové qui c'esteûve on fwârt bia ètèremint. »

À branmint, il ont d'meuré j'qu'au d'bout. « Po one parèye djin, on n' pout nin fé mwins', don ! ».

C'est minme sès quate mèyeûs soçons qu'ont pwarté s' cwârps au coron dol cimintière.

Après saquants dêrènès pâters, lès-ovrîs dèl comune ont apougnî lès deûs cwades po l' dischinde o l' fosse. Ci n'esteûve nin vraîmint dès cwades. Ça r'choneûve di pus à dès cûrias come on s'è sièt al maujone po r'lèver lès volèts, dîreu dj'. Vola-t-i nin qu'onk dès deûs vint à skèter d'zo l' pwèd do vacha. Dji n' vos l'aveûve nin dit, mins ci n'esteûve nin l' mitan d'on-ome, savoz, nosse Ziré. Èt bardaf, li caïsse qui tchaît dins l' fosse... avou onk di cès brûts-là. À vos fé r'lèver on mwârt !

À costé d' mi, li Twin.ne chufèle à m'-y-orèye :

« S'i n'esteûve nin mwârt, il a stî touwé ! »

Li maïsse ovrî, tot pèneûs, saye di s'èscuser addé l' famille

« Nos n'avans jamais yeû l' fârce ! C'est bin l' prumî côp ! »

Quéquefiye bin, mins tot-z-è ralant, branmint ont sondjî : « Ça n' p'leûve ariver qu'à l'ètèremint da Ziré, one afaire parèye ! »

Bernard Van Vynckt - décimbe 2013